

# MEJE PO CARTE PABLO TATINA, TITO TATINATSI

---

Meje yabara poxonae Pablo tamropata pitaba xua tatina, Tito tatinatsi

**1** <sup>1</sup>Xan, Pablon, pon Nacom tatanacuichin matautano Jesucristo pia peitorobi jiton tatsin. Jesucristo neitoroba xua tayawenaewa tsane jiwi xua barapomonaе pejume cowuntsinexa Nacom. Pewunaeya copiya Nacom itapeta barapomonaе, xua pejume cowuntsiwa tsainchi. Matautano neitoroba xua barapomonaе yaputane taexanaenexa Nacom pia pexainyei jume diwesi xua daxota barapomonaе Nacom peitabaratha xanepanaya pejinompaewa tsane. <sup>2</sup>Poxonaе barapomonaе jume cowanta Nacom, barapomonaе ewata xua Nacom catsina pia peajuntuyapusawa po peajuntuyapusawa ataya tsiteca. Bapon Nacom bapana jopa penaeabin. Barapo peajuntuyapusawa po peajuntuyapusawa ataya tsiteca, caena bayatha Nacom yabara tsiwunaе muxu duta jiwi poxonaе cataunxuae jopa nacua forotsiyo. <sup>3</sup>Ichitha anoxuae nama Nacom peichichipaexae barapo matabitha daxota jiwi yabara yaputane exainchi xua pia pexeinya jume diwesi tatsi. Nacom necopata xua bara tacueicueijejiwa tsane barapo diwesi daxita jiwitha. Nacom pon xua jiwi Pecapanenebiyaеin neitoroba xua tacueicueijejiwa barapo diwesi poxonaе necata barapo pia penacuichiwa tatsi xua tatanacuichinexa bapon. <sup>4</sup>Barapo carte cata tinatsi Titom, ponxaem be yatsicaewa taxantom catsicotainchi iru nejume cowuntsixae Jesucristo. Barabu Nacom pon Waxa, iru Jesucristo pon Wanacacapanenebiyaеin petupae cuiru coyene weya, cayawenaenabe pia necaantobewaxaеbe. Matautano juntema pona caexanaenabe.

Meje yabara xua Tito Creta tunaeto nacuatha nacuita

<sup>5</sup>Caena bayatha Creta nacua tunaetha cacuentapoinchi xua neyawenaenexa Jesucristo pejume cowuntsiwi pocotsiwa xua nacata seicabe. Daxota cacuentapoinchi xua neitapetsinexa pitiri jiwi xua



piamonaexae. Bapon yabara jeye piamonae: “Maisa Creta tunaetomonae, barapomonae jiwi muxuitorobeiba, yawa be unupiwi pomonae peaitoisia jiwi yawa napenajuba nawita yawa fifina nawita”, jei bapon. <sup>13</sup>Poxonae bapon baxua paeba barapara jume xainyeya paeba. Daxota xam Titom barapomonae bichocono jume matawende xua barapomonae xaniwaicha jüntema pejinompaewa tsane xua Jesucristo pejume cowuntsiawatsi. <sup>14</sup>Matautano cui matawende barapomonae xua jopa equeicha pejume naitaewatsinexa judiomonae pia pejemai diwesin tatsi. Matautano cui matawende xua jopa pejume naitaewatsinexa pomonaetha pomonae xua jiwi peitorobiwatsi xua jiwi pejume itawetsiwa tsane Nacom pia pexainyei jume diwesi tatsi.

<sup>15</sup>Pomonae yabara jume cowanta xua Cristo tsitupa barapomonae, barapomonae jame pejuntu coyene xanepanaewi. Barapomonae daxita po coyenein xua tane tsita xanepanatsi. Seicaya nama pomonae jopa yabara jume cowantsiyo xua Cristo tsitupa xua barapomonae tsitupatsi, barapomonae apara peajuntucoyenebewi. Barapomonae daxita po coyenein xua tane tsita abetsi. Barapomonae pia penanta xeinaewan jopa xaexaenaecaeyo, yawa pia juntu coyenein tatsi po juntu coyenein itorobeibatsi xua poxonae peexaneibinexa, bichocono jopa xaexaenaecaeyo. <sup>16</sup>Barapomonae jei: “Nacom pajume cowantan”, jei. Daichitha poxonae exaneiba, icha coyene exaneiba icha ichi pomonae jopa pejume cowantsiwi Nacom. Bara barapomonae Nacom tsita abetsi pejumefebixaetsi pocotsiwa itoroba. Matautano jopa itacupaetsi xua exana pocotsiwa xua pexeinya penacuichiwa.

### Meje yabara pocotsiwa Nacom pia pexainyei jume diwesi tatsi

**2** <sup>1</sup>Ichitha xam Titom pocotsiwa cuidubame bewa cayabara cuita cananta xeineibim xua u pocotsiwa Nacom pia pexainyei jume diwesi tatsi. <sup>2</sup>Pitiri jiwi muxuwere xua jopa bewa nacupa naexanae peatsaxa meran. Matautano muxuwere xua xaniwaichiya pejinompaewa tsane xua daxota ichamonae pebaru cui itura jinaewa tsane, xua barapo pitiri jiwi pebaru cui itura jinaewa tsainchi. Matautano muxuwere xua penajuntu coyene itorobeibinexa xua peexaneibinexa po coyenein xua wanae. Matautano muxuwere xua xaniwaichiya pejume cowanta dubenanaebiyawa tsane xua Nacom xaniwaicha pejume cowanta dubenanaebiyawa tsainchi. Yawano muxuwere xua piamonae peantobe tsurubenanaebiyenexa. Yawano muxuwere xua ayapusuya jume cowantsina poxonae bequein ichamonae abe taexanatsi. <sup>3-4</sup>Barichi pitiriwaxi muxuwere xua xanepanaya pejinompaewa tsane, icha be ichi poxonae jinompa powaxi jume cowanta Nacom. Matautano barapowaxi jopa bewa cueicueijej tsane po jumein xua abe xua ichamonae yabara paebatsi. Yawa jopa bewa nacupa naexanae peatsaxa meran. Matautano

barapo pitiriwaxi muxuwere xua piseuriwi peantobe nexa tsaibi tsane, xua daxota iru xuya penawaxi pebarichinexa xua peexanaenexa po coyene wuna xua peantobe nexa tsaibi tsane piseuriwi yawa pia pexuithano. <sup>5</sup>Matautano muxuwere barapo pitiriwaxi xua penajuntu coyene itorobeibinexa xua peexaneibinexa po coyenein xua wuna. Matautano muxuwere xua penajuntu coyene xanepana exanaenexa. Matautano muxuwere xua xanepanaya peewatsinexa pia boxi. Matautano muxuwere xua peyabara cui cananta xeinaenexa xua peyawenaenexa pomonaetha pomonae pia botha petajinompawewichi. Yawa muxuwere barapo pitiriwaxi xua jume jejei tsaibi tsane poxonae itorobeibatsi piseurixi xua ichamonae jopa abe peyabara paebinexa Nacom Pejume Diwesi.

<sup>6</sup>Matautano barichi pewowi muxuwere xua penajuntu coyene itorobeibinexa xua peexaneibinexa po coyenein xua wuna. <sup>7</sup>Xam Titom barapo pewowi peitatha tatsi xanepanaya eexanaponde daxita coyenein poxonae exaneibame. Barapoxonae barapo pewowi xua pebarichinexa xanepanaya peexanaenexa po coyenein wuna. Poxonae pewowi cuidubame xainyeya cuidubare nejuntu coyene wetsina. Matautano xanepanaya beta cuidubare. <sup>8</sup>Xanepanaya betiya cueicueijande xua ichamonae jopa abe necayabara paebiwa tsane. Daxota barapomonae aura tsaibi tsane xua abe necayabara paebebiwa beta neexanaexae. Bapoxonae barapomonae jopa itacupae tsainchi xua abe wanaca yabara paebiwa.

<sup>9</sup>Tsipaebare pomonaetha pomonae pebusi cui tatayebeibiwichi xua amanaya tanacuita xua poxonae ichamonae tanacuitatsi, jande: “Paexande daxita xua painya nepaca canamataxeinaewi paca itoroba. Matautano xanepanaya patsita exande painya nepaca canamataxeinaewi. Jopa pin jumetha pajume noteibinde poxonae paca itorobeiba painya nepaca canamataxeinaewi”, jande. <sup>10</sup>Yawa jande: “Jopa pacaibinde, jame saya beta pata exande painya nepaca canamataxeinaewi, xua daxita jiji painya nepaca cui yaputaenexa xua bara paexaname pocotsiwa Nacom paca cuiduba pia pexeinya jume diwesi tatsi, pon Wanacacapanenebiyaein abe waexanae cuiru coyene weya”, jande.

<sup>11</sup>Nacom bayatha naca yaputane exana xua bara naca yawena pia wanaca antobexae. Naca yawena poxonae naca capanenebiya. Barapo pecapanenebiyae coyene daxita nacuanpiwi nexa. <sup>12</sup>Barapo coyene xua Nacom pia peyawena coyene jiwitha pia peantobewaxae, naca cuiduba xua wanacui barapentsiwa tsane abe waexanae cuiru coyenein. Yawano naca cuiduba xua wapentsinexa xua po coyenein cayabara cananta xinatsi po coyenein exana pomonae jopa pejume cowuntsiwi, xua pomonae jinompa po cae pin nacuathe. Matautano naca cuiduba xua najuntu coyene itorobeibinchi xua waexaneibinexa po coyenein

xua wūnae barapo cae pin nacuathe yawa xanepanaya wajinompa dubenanaebiyaenexa xuano xua xainyeya waexana dubenanaebiyaenexa pocotsiwa Nacom itoroba. <sup>13</sup>Yawa naca cuiduba xua wawūnae ewatsiya jinompaewa xua equeicha caewa patopaetsica pon xua bayatha Nacom yabara naca tsiwūnae muxu duta. Waxainchi ewatatsi xua Jesucristo pia pepatopaewa pexeinya peitūpanae coichatha. Bapon barapara wapepa Nacom xuano xua Wanacacapanenebiyaein. <sup>14</sup>Jesucristo nacaenaeta xua naca tsitūpa wanaca capanenebiyaenexa daxita coyenein weya xua abe waexanae cuiru coyenein. Mataūtano nacaenaeta wanaca jūntū coyene xanepana exanaenexa poxonae naca yabara jūntemaina abe waexanae cuiru coyenein. Baxua Jesucristo exana xua piamonae tatsi pia wanaca exanaenexa, xua pomonaetsi xua waichichipaewatsi xua waexanaewa pocotsiwa wūnae.

<sup>15</sup>Xam Titom barapo coyenein bewa cuidubim. Jūntū cui coyene tsacabare xua barapomonae jūntema pejinompaewa tsane. Mataūtano muxuwere daxita barapo Creta tunaetopiwi xua bara xanepanaya peexanaewa tsane daxita peitorobi coyenyatha po peitorobi coyene xua Nacom cacata. Jinxoba barapomonae peitūtha exaname po coyenewa xua daxota barapomonae tsita pecui pawī nenaexanaewa.

**Meje yabara po coyene bewa exanae pomonae  
Nacom pejume cowūntsiwichi**

**3** <sup>1</sup>Xam Titom barapo Creta tunaeto nacuapiwi equeicha caewa yabara nanta xeina exanare xua bewa barapomonae jume jejei xua peexanaewa tsane pocotsiwa barapomonae itorobeibatsi pomonae barapomonae pia peyanacua ewatsiwichi xuano pocotsiwa barapomonae itorobeibatsi pomonae pia pentacaponawichi. Mataūtano muxuwere xua bewa barapomonae najūntū cui wūnaetsiya exaneibina xua peexanaenexa tsaibi tsane pocotsiwa xua wūnae. <sup>2</sup>Mataūtano muxuwere xua bewa barapomonae jopa abe paebi tsane xua ichamonae abe peyabara paebiwatsi. Mataūtano muxuwere xua barapomonae jopa bewa jume matsontsonobi ichamonaetha. Mataūtano muxuwere xua barapomonae bewa jūntū coyene xanepanaya cueicueijeji ichamonaetha. Mataūtano muxuwere xua bewa barapomonae barū cui itura jina dubenanaebiyaena daxita jiwi.

<sup>3</sup>Caena bayatha copiya waxainchi jopa wajume cowūntsiwi, jopa Nacom wayaputaexae. Yawa jopa wajume jejei jiwi pocotsiwa Nacom naca itoroba. Yawa waxainchi naca itaxanumena. Waxainchi wajūntū coyene naca itoroba xua waexanaewa pocotsiwa waichichipaewa pocotsiwa xua abe. Mataūtano naca itoroba xua bewa exanaetsi po peabe coyene naca weiweina exana icha ichi pomonae jinompa po nacuathepiwi. Mataūtano abe peexanae cuiru coyenein exana dubenanaebiyatsi, xuano xua peuwi

jũntũ coyeneya jinompa dubenanaebiyatsi. Mataũtano ichamonae naca ita aenae-aenei tsurubenanaebiya, yawano xua waxainchi nantiya naita aenae-aenei tsurubenanaebiyatsi. <sup>4</sup>Ichitha Nacom pon Wanacacapanenebiyaein yabara naca yaputane exana xua po coyene bapon naca jũntũ coyene xanepana exana, xuano xua wanaca antobewa poxonae naca capanenebiya abe waexanae cuiru coyenein weya. <sup>5</sup>Naca capanenebiya, apara jopa poxoruyo xua xanepanaya waexanaexae bapon nexa, apara poxoru nantanuweya naca yabara nanthũ coyene xeina pia wanaca yawenaenexa. Poxonae naca bautisaba meratha baraxua saya yabara caunuta xua Nacom pia Pejumoŋe tũnaxũ tatsi naca jũntũ coyene xanepana exana. Poxonae baxua naca cana exana bapoxonae pena jũntũ coyene xeinatsi, xua poxonae Nacom pia Pejumoŋe tũnaxũ tatsi naca jũntũ cui coyene yabara cajũntemaina abe waexanaewan. <sup>6</sup>Jesucristo pon Wanacacapanenebiyaein nacata itorobica Nacom pia Pejumoŋe tũnaxũ tatsi pia jopa juniya wanaca yawenaenexa. <sup>7</sup>Poxonae Nacom naca jũntũ coyene xanepana exana, bapoxonae naca cana exana xua jopa wanatsiaenae cuentsinexatsi bapontha. Bapon naca yawena pia wanaca antobexae. Daxota waxainchi ewatatsi xua Nacom wanaca catsibiwa tsane peajũntũyapusũwa, po peajũntũyapusũwa ataya tsiteca, tsipei bapon pia pexuichi.

<sup>8</sup>Baxua jame xainyeya pepaebiwa. Ichichipan xua xam jume daunweya tsipaebiname barapomonae xua bewa barapomonae barapo coyene exanaena pomonae xua pejume cowũntsiwixae Nacom. Bapoxonae barapomonae cui enatsi xua peyabara nanta xeinaewa po penacuichi coyenein xua ichamonae tsita xanepanatsi. Barapo petanacuichi coyenein jame xanepana, yawa barapo coyenein jiwi yawenatsi. <sup>9</sup>Dotande xua necuiyainwande xua ichamonae yabara necabarũ najume matsontsonobiwa tsane po diwesin xua pejemai diwesin. Mataũtano cuiyainwande xua yabara necabarũ cueicueiweiwa judiomonae pia pamo susatopiwi tatsi pia wũnxi tatsi. Mataũtano cuiyainwande xua penajume matsontsonobiwa xuano xua anaya peyabara pepaebiwa Moisés pia peitorobi coyene tatsi. Tsipei ba poxonae barapo coyene exana jiwi, jopa yawenaetsi xua xaniwaichiya pejinompaewa xua jiwi jopa pexainyeiwanxae.

<sup>10</sup>Ichã ichũn cana exana xua pomonae Nacom pejume cowũntsiwichi, cana exanatsi xua barapomonae pomonae Nacom pejume cowũntsiwi be pomonae jopa penayaitae jiwi penaexanaewa tsane xua penaita aenae-aeneiwa, bara bapon muxuwere. Ichã equeicha jopa xapain exanaeyo equeicha muxuwere. Ichã equeicha jopa beta exanaeyo bapoxonae bapon itawere painya xainya weya. <sup>11</sup>Yaputaneme xua barapon pia coutha najũntũ coyene matanonoxuba xua abe peexanae cuiru coyene peexanaewa. Daxota abe peexanaexae pia coutha natsicuenta exana Nacomtha.

**Meje yabara xua Pablo muxu tsipaeba pocotsiwa bewa Tito exanaena**

<sup>12</sup>Poxonae nexainya beya cata itorobatsi Artemas, ichacuiṯa tsipae icha cata itorobatsi Tíquico, nexata bapoxonae yacuinaya ponare Nicópolis tomara beya. Nexata barapo tomarathiya netaename, tsipei bayatha nanta xeinan xua baxotiya taecaewa tsane awúbotha. <sup>13</sup>Zenas pon jiwi yaweneibatsi peyabara yaputaeinxae peitorobi coyenein, irurú pon pewún Apolos pon xua casiwa ponabe baponbe yawendebe. Bara exande be pocotsi coyeneya xua caitacúra xua yawename. Baponbe carebe pocotsiwa xua canantawenonabe poxonae pewarapaenexabe xua jopa petaseicaenexa tsainchibe. <sup>14</sup>Barabú wajiwimonae xanepanaya exanaponaena xua daxota peyawenaenexa xua peyawenaenexatsi pomonae peacopeibiwi pocotsiwa xua canantawenona. Bapoxonae pia juntú coyenein tatsi Nacom tsita xanepanatsi.

**Meje yabara xua Pablo najume wetsiya paeba**

<sup>15</sup>Pomonae taxantha ena barapomonae cajacoba. Painta jacobare pomonae Jesucristo pejume cowúntsiwichi, pomonae bichocono paantobein pejume cowúntsixae. Barabú Nacom paca yawenaena daxita paxam pia paca ncaantobexae.  
Baja Pablo.